

Meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit inatsisartut inatsisaata nr. 16, 3. December 2012-imeersup allanngortinneqartariaqarnesoq pillugu apeqquteqaat aallaavigalugu oqallinnissamik siunnersuut. Meeqquerivinni meeraaqquerivinnilu pisortat allaffissornerujussuarmik suliaqarnesisa oqilisaaffigineqarnissaat qanoq ilillugu oqilisaaffigineqarsinnaava.

(Inatsisartunut Ilaasorta: Anthon Frederiksen, Partii Naleraq)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Naalakkersuisut Inatsisartunut Ilaasorta, Anton Frederiksen, Partii Naleraq, nunatsinni ulluunerani paaqqinnittarfinni pisortat suliarisartagaat pillugit apeqquteqaat aallaavigalugu oqallitoqarnissaanik siunnersuutaanut qutsavigaat.

Aallaqqaasiullugu Naalakkersuisut maluginiaqussavaat ullumikkut ulluunerani paaqqinnittarfiup pisortaata ulluunerani paaqqinnittarfiup isumannaatsumik aamma malittarisassat atuuttut naapertorlugit ingerlanneqarnissaanut perorsaanermut allaffissornikkullu aqutsinermut tunngasut akisussaaffigimmagit. Ulluunerani paaqqinnittarfiup pisortaata sulisunut tunngatillugu pissutsit taamatullu atuisut ataatsimoorfiisa imaluunniit siulersuisut taakku innersuussutaat malillugit aalajangigaasa suliarineqartarnissaat akisussaaffigai.

Siunnersuuteqartup ilisimariigaatut kommunip meeqqanut suli atualersimanngitsunut ulluunerani neqerooruteqartarfinnik ingerlatsinissaq akisussaaffigaa.

Atorfinitsitsisartutut oqartussaasut malittarisassat atuuttut malillugit ullumikkut ulluunerani paaqqinnittarfiup pisortaa allaffissornikkut aqutsinermik suliassanik suliaqartinniarinagu toqqarsinnaavaat, tassa ulluunerani paaqqinnittarfiup ilusiligaanerata aamma ulluunerani paaqqinnittarfinni suliassanik agguaaassisarnerup taamaaliornissaq pisariaqartippassuk aamma atorfinitsitsisartutut oqartussaasut uppersarsinnaappassuk perorsaanermut, allaffissornikkut aqutsinermut sulisunillu aqutsinermut tunngatillugu suliassat naammaginartumik naammassinneqartartut.

Taamaammat allaffissornikkut aqutsinermi suliassat qanoq agguaatarnissaat kommunit atasiakkaat nammineq aalajangigassaraat. Tamanna peqatigitillugu erseqqissarneqassaaq ulluunerani paaqqinnittarfiup pisortaa qanoq pisoqarnera apeqqutaatinnagu pingaarnertut allaffissornikkut aqutsinermut akisussaasuussammat tamannalumi aammattaaq § 19 imm. 2-mi aalajangersakkamut tunuliaqutaavoq, allassimammat meeqqeriviup pisortaa inini sulisut amerlassusissaattut aalajangiussanut ilaangitsoq.

Pingaarnertulli inernilunneqartariaqarpoq inatsisitigut ullumikkut periarfissaqareemat atorfinitsitsisartutut oqartussaasut pisortamik allaffissornikkut aqutsinermi suliassanik suliakkii-sannnginnissaannut, ulluuneranilu paaqqinnittarfinni perorsaanermut tunngassuteqarnerusunik aqutsinissamut inissaqartitsinerunissaannut.

Naalakkersuisut Inatsisartut oqalliluarnissaannik kissaappaat.